

ROCHAN CHHE THEI LO



CHÂNGVAWN: “Tûnah chuan thutak zâwma inhmangaih tawn tak tak tûra nangmahni in intihthianghlim tawh avângin thinlung takin inhmangaih tawn ðeuh rawh u,” (*1 Petera 1:22*, NIV).

SABBATH CHAWNÛ

APRIL 1

Chhiar tûrte: Leviticus 11:44, 45; Ezekielia 33:11; Johana 3:16; 1 Petera 1:1, 2; 1:3–21; 1:22–25.

BIBLE hi a bu malin emaw, bu mal pakhat chhûnga khawi lai bîk emaw kan zir a nih chuan, a chhâna hmuh ngei kan duh zawnha tlêm azâwng tal kan nei ngei ðhînin a rinawm.

A hmasa berin, chu lehkhabu/lekhathawn chu tute chhiar atâna ziak nge a nih tih hriat phawt a ðha a. A dawt lelah chuan (a pawimawh zâwk pawh a ni hial mai thei), chu lehkhabu/lekhathawn chu eng vânga ziak nge a nih tih hriat hmasak a pawimawh leh bawk. A ziaaktu thu khel ber chu eng chungchâng nge ni? (Entîr nân, Paula chuan Galatia khuua kohhranhote hnênah khân chhandamna leh dân inkungkaih tawn dân chungchâng ngaihdân dik tâwk lo awm chu chin fel tumin a ziak a). Kan hriat angin, Thuthlung Thar lama lehkhabu tam zâwk hi chu lehkhathawn a ni hlawm a, tin, lehkhathawn-ah chuan a lo chhiartu tûrte tâna pawimawh tûr thuchah ziah a ni ðhîn tlângpui bawk.

Ṭawngkam danga sawi chuan, Petera lekhathawnte hi kan chhiar dâwn a nih chuan, kan chhiar hmain hêng lekhathawnte hi tute tâna ziaik nge a nih tih leh, eng vânga ziaik nge a nih tih hriat hmasak phawt a ṭha a. Eng thu nge a sawi a, eng vânga sawi nge a nih? A pawimawh ber chu: hêng a lekhathawnte aṭang hian eng thuchah nge chhar chhuah theih kan neih tih hi a ni. Chûng a lekhathawnte chu kan han chhiar ang a, a châng hmasa tlêm azâwng-ah tê mai pawh hian Petera hian keini tûnlai huna mîte tâna pawimawh thutak tam tak puan chhuah tûr a nei a ni tih kan hmu dâwn a ni.

SUNDAY

APRIL 2

Tlân darh hote hnênah

Lehkha, “Ka Pu” ti-a inṭan ziahna thu i chhiar a nih chuan, chu i lehkha dawn chu eng dang ni lovin, lekhathawn a ni tih i hre mai ang. Chu lekhathawn chu mi tu emaw, nangmah la nêl vak lotu hnên aṭanga i dawn a ni maithei bawk. Tûnlaia mîten lehkha kan inthawn a, ziah ṭan dân bîk kan nei ang bawk hian hmânlai mîte pawh khân ziah ṭan dân phung nghet zawm tlân deuh an nei ve a. Petera pawh hian hmânlaia an tih dân pângngai ang chu zâwmin ama hming a ziah zet hnu-ah a lekhathawn lo chhiartu tûrte a ziaik lang bawk a ni.

1 Petera 1:1 chhiar la. He Bible châng pakhat tê aṭang hian he lekhathawn ziaiku leh a lo chhiartu tûrte chu tute nge ni tih kan hre mai thei em?

Hetah hian a ziaiku chu amah Petera ngei a ni tih Chiang takin a sawi a. A hming chu thumal lo lang hmasa ber a ni nghe nghe. Mahse, a hnu lawkah hian “Isua Krista tirhkoḥ” tiin a insawi zui leh nghâl tho a ni.

Tichuan, Paula pawhin a tih fo dân angin (*Galatia 1:1; Rome 1:1; Efesi 1:1*-te hi en la), Petera hian Krista

rawngbâwlto, Krista tirhkoh a nihna chu a tîr phat aţangin a târlang nghâl a, chu chuan Pathian kohna dawng ngei a nihzia a tilang bawk. “Apostol” a ni a, chumi awmzia chu “tirhkoh” tihna ni, a tîrtu pawh tu dang ni lovin LALPA Isua Krista ngei a ni bawk.

A lekhatawn thlenna tîr ramte pawh a sawi lang bawk a, chûngte chu Ponto te, Galatia te, Kappadokia te, Asia te leh, Bithunia te a ni. Hêng ramte hi Asia Minor-a ram bung then hrang hrangte an ni a, tûnlai Turkey ram chhûnga Bosphorus an tih tâk chhak lam vêl khu niin an ngai.

Petera hian Juda Kristiante lo chhiar atân a ziak nge ni a, Jentail-te zînga ringtute tân a ziak zâwk tih thu-ah inhnialna a awm then a. 1 Petera 1:1-a Petera ţawngkam hman, khualzin/saltâng tih leh tlân darhho tihte hi kum zabi pakhatna lai vêl kha chuan Ram Thianghlim (Israel) ni lo ram danga Juda chêngte sâwi nân hman a ni ber then a. Chutih laiin, 1 Petera 1:2-a “thlan” tih leh “tihthianghlim”/”tihhran” tih thumalte hi chu Juda-te leh Kristiante nên pawh a inrem thlap ve ve thung. Anmahni zînga mi ni lo pawns lam mîte chu “Jentail-te” (1 Petera 2:12, 4:3) tia a sawi avâng hian a lekhathawn ziah lo chhiartu tûrte hi chu Juda mi an nih ngei chu a rinawm hle a ni.

Bible hrilhfiatu thenkhat chuan 1 Petera 1:18 leh 4:3-a Peteran a sawite hi Juda sakhua vuantute hnênah âi mahin, Kristiana rawn inlet tawh Jentail-te hnêna sawi a inhmeh zâwk niin an ngai a. A thu hrimah, “in thlahtute aţanga in chhawm nun dân sawngsawhlawt lo” (NRSV) tih ţawngkamte hi chu Juda-te lo chhiar atân a ziak duh ang em? Chutiang bawkin, “Tûn hma zawng khân Jentail-te duhzâwng thil, hêng – hurnaah te, tisa châkna hman duhnaah te, zu ruihnaah te, zu hmun hlimnaah te, zu in ho dur durnaah te leh, milem biakna tenawm takah te kan lo inhmang nasa tawh a, tûnah chuan i duh tâwk tawh ang u,” (1 Petera 4:3, NKJV) tih thute pawh hi Juda-te hnêna a sawi a rinawm chiah lo bawk.

Kan tâna pawimawh zâwk tak chu hêng lehkhathawn pahnihte hi tute lo chhiar atâna ziak nge a nih tih ni lovin, eng thuchah nge a ken tih zâwk hi a ni.

THAWHTANNÎ
Thlante

APRIL 3

1 Petera 1:2 chhiar la. He lai thu hian a lehkhathawn lo chhiar tûra a duh dangte pawh a târlang a. Chûng mîte chu engtin nge a koh?

Juda-te emaw, Jentail Kristian-te emaw tâna a ziah a nih leh nih loh chu thu hran ni se, thil Chiang tak pakhat awm chu: he lehkhathawn lo chhiartu tûrte hi “Pa Pathianin a lo hriat lâwk ang taka a thlante a ni” (*1 Petera 1:2*) tih hi a ni

Mahse hetah hian thil hriat fiah tûr pawimawh tak pakhat a awm. He lai thu hi Pathianin mi ðhenkhat chu chhandama awm tûrin leh mi ðhenkhat chu tihborala awm tûrin a ruat lâwk sa vek tawh tihna a ni lo tih kan hre tûr a ni a. Chutiang a nih chuan Peteran lehkha a thawnte hi chhandam ni tûra Pathianin a thlan tawhte an ni a, chutih laiin mi dang zawngte chu boral tûrin a a ti sa tawh reng tihna a ni dâwn a. Mahse chutiang chu Bible-in min zirtîr dân a ni si lo.

1 Timothea 2:4; 2 Petera 3:9; Johana 3:16 leh Ezekiel 33:11 te hi chhiar la. Engtiangin nge hêng Bible chângte hian Peteran “thlante” tia a lehkhathawn lo chhiartu tûrte a kohna chhan hi hrethiam tûrin min ðanpui?

Bible hian mi zawng zawng chhandama an awm vek theih hi Pathian ruahmanna chu a ni tih Chiang takin a sawi a, chu ruahmanna chu leilung pian hma daih tawh khân anmahni mihringte tân siam a lo ni tawh bawk: “Leilung pian hma khân ani chuan min lo thlang daih tawh a” tih ang khân (*Efesi 1:4*, NKJV). A tûra Pathianin a ruahman dânah chuan mi zawng

zawng hi a bo a bâng awm lova chhandam vek a ni a, kan “zavai” hian Pathian chuan min “thlang” vek a ni. Mihring zawng zawng hi chatuan nunna chang tûrin a ruat lâwk sa vek bawk. Chumi awmzia chu, tlanna ruahman hi chhandamna chan theihna tûrin mi zawng zawng tân a tha/tling tâwk tihna a ni a. Mahse, chu tlannain pêk a tum chu mi zawng zawngin an lo pawm vek dâwn tihna erawh chu a ni lo.

Pathian hriat lâwkna anga thlan tih awmzia chu chhandamna chungchânga duhthlanna an siam tûr chu a hman a lo hre lâwk vek tawh tihna a ni ber mai a. Mahse chutianga a lo hriat lâwkna chu engti kawng mahin duhthlanna an siamna tûrah a rawn inrawlh si lo. Nu pakhat chuan a fapa-in behlâwi rah ni lovin, chocolate zâwk a thlang ngei dâwn a ni tih a hre sa vek a, mahse chutianga a hriat sa-na chuan a duh lohpuï zâwk chu a thlan luihtîr chuang lo ang chiah hi a ni.

Pathian chuan chhandamna chang tûrin a lo thlang tawh che a ni tih thu thlamuanthlâk tak i hriatna aţang hian eng ang hriat chianna nge i lo neih ve theih?

THAWHLEHNÎ
Thupui pawimawhte

APRIL 4

1 Petera 1:3–12 chhiar la. Hêng châng pariata Petera thuchah pui ber chu eng nge ni?

A lehkhathawn lo chhiartute chibai a bûknaah (*1 Petera 1:1, 2*) hian Pa leh Fapa leh Thlarau Thianghlim hming a sawi lang vek tawh a. Hêng Pathiana minung pathumte hian 1 Petera 1:3-12-a Petera thil sawi beiseina nung hi an siam a. 1 Petera 3-9 hian Pa leh Fapa chungchâng a sawi a, tin, 1 Petera 1:10-ah hian Thlarau Thianghlim a langsâr ber ve thung.

Pa leh Fapa chungchâng leh, Thlarau Thianghlim hnathawh dân chanchin a ziah pah hian nakina a khel zui tûr thupui dang tam tak pawh a sawi lang nghâl bawk a. Kristiante chu piang

thar, Pathianin a hrin tharte an ni a (*1 Petera 1:3; Johana 3:7*). Krista thawhleha leh vâna anmahni lo nghâk rengtu rochan chhe thei lo chuan an nun a siam thar tawh a ni (*1 Petera 1:3, 4*). Hetah hian, Thluthlung Thar lehkhabu dang tam takahte pawh kan hmuh angin, Isua thawhleha chu Kristiante beisei inngahna a nihzia chiang takin a lang.

Chu beiseina chuan Petera lekhathawn pakhatna chhiartu, hrehawm tuar mêk Kristiante chu hlimna tûr chhan ða tak a pe a. Mei sa takin rangkachak a tithianghlim ang deuh hian, chu an hrehawm tawrh mêkte chuan an rinna fiahin a tithianghlim baw. Petera lekhathawn lo chhiartute hi chuan Isua kha a hring a hrânin hmu ve hman lo mah se, amah chu an ringin an hmangaih êm êm tho a. Amah an rinna rahchhuah chu chhandamna leh “rochan chhe thei lo, bawhlawh kai lo leh, chuai thei lo, an tâna vâna khêka awm chu a ni baw” (*1 Petera 1:4, NKJV*).

Petera hian a lekhathawn lo chhiartute chu an chungga khawngaihna a lo la thlen tûr thu hmasâng zâwlneite khân an lo hril lâwk tih a hriattîr baw a (*1 Petera 1:10*). Thuthlung Hlui hunlaia zâwlneite khân hêng mîten Isuaa chhandamna an chan mêk chanchin hi “chhui chhuah” tumin an lo “zawng” ðhîn a (*1 Petera 1:10*). Chutianga an rinna avânga hrehawm an tawrh mêk lai chuan Petera hian rawn thlamuanin, soal leh ða indonaa tel ve an ni thu a hrilh a. A tum ber zâwk chu fiahna leh hrehawm tawrhna kârah pawh thudik chu rinawm taka vuan tlat zêl tûra fuih a ni.

1 Petera 1:4-ah hian vânah khian rochan chhe thei lo kan tân khêka a awm thu kan hmu a. Vânah khian nangma ta bil tûra buatsaih hmun a awm a ni tih hria la. Chuti a nih chuan, engtin nge he thutiam ropui tak mai hi mi mal takin i chhân ang? _____

Chhandam tawh kan nihna anga nungin**1 Petera 1:13–21 chhiar la. He chângin a sawi ang hian Kristiante nungchang kaihrulaitu tûr ber chu eng nge ni?**

1 Petera 1:13 ințanna thu, “chuvângin” tih hian a hnua a sawi leh tûr chu a sawi zawh chiah ațanga lo piang chhuak a ni tih a tilang a. Nimin zirlaiah pawh kan hmuh tawh ang khân, Petera hian Pathian khawngaihna leh Isua Kristaa Kristianten beiseina an neih chungchâng a sawi zo chiah a ni (*1 Petera 1:3–12*).

Chu khawngaihna avâng leh beiseina an neih avâng chuan an “rilru puan veng a ngaihven” tûrin a hrilh a (*1 Petera 1:13*). A awmzia chu, Isuaa chhandamna an neih chhân lêtna atân nghet taka ring tûr leh rinawm tlat tûrin an rilru an buatsaih tûr a ni tihna a ni (*1 Petera 1:13*).

1 Petera 1:13 chhiar la. Isuaa khawngaihna puan chhuah chung a beiseina nghah pumhlûm thak tih chu eng nge ni a awmzia?

Thil Chiang tak chu, Petera hian Isuaah chauh an beiseina nghat tûrin a hrilh tih hi a ni. Chutih rual chuan, Kristiante chu chhandam tawh an nih tlat avângin mi dangte âia thianghlim zâwk an nih a pawimawh thu uar takin a sawi ve leh tho bawk a. Kristiante nungchang thianghlim bîkna tûr chhan ropui deuh deuh pathum a sawite chu: amah Pathian chu a thianghlim êm avâng te (*1 Petera 1:15, 16*), mi tin hi an thilhtih ang zêla thlei bîk nei lova an chungthu relsak an la nih dâwn avâng te (*1 Petera 1:17*) leh, min tlanna man a sân êm avâng te a ni (*1 Petera 1:17–21*).

Thianghlim taka nung tûra Kristiante fuih phûrtu tûr hmasa ber chu Pathian nungchang a ni a. Chu nungchang chu “Pathian chu a thianghlim a ni” tiin a khâikhâwm theih bawk. Peteran, “Nangni in thianghlim tûr a ni, kei ka thianghlim si a” (*1 Petera*

1:16) tih thu a sawi hi Leviticus 11:44, 45 thu a sawi chhâwn a ni a. Chuvângin, Isua zuitute chu an thianghlim tûr a ni (*1 Petera 1:15–17*).

A pahnihna chu Pathian thianghlim tak chuan duhsak bîk leh thlei bîk nei lovin, mi tin an thiltih ang zêlin an chungthu a la rêlsak dâwn tih an hriat vâng a ni a (*1 Petera 1:17*).

A pathumna chu Kristiante chu tlan tawh a nih tih thutak ropui tak aṅanga lo chhuak a ni ve thung. Chumi awmzia chu, mana lei tawh an ni a, an man pawh a sâng hle nghe nghe: Krista thisen hlu taka tlan an ni (*1 Petera 1:19*). Petera hian Isua thihna kha hun kal tawha thil thleng palh pakhat ve mai ni lovin, leilung pian hmâ daiha lo ruahman lâwk vek tawh a nih thu uar takin a sawi a ni (*1 Petera 1:20*).

Kristian i lo nih ve chhan hi eng nge ni? Eng vâng Kristian lo ni ve nge i nih tiin miin zâwt ta che se la, engtin nge i chhân ang a, eng vângin nge chutiang chuan i chhân ang?

NINGANĪ

APRIL 6

Inhmangaih tawn theuh rawh u

Hêng thilte a sawi hnu hian Kristiante chu nun dân thianghlim leh rinawm tak chu eng hi nge ni tiin a zâwt leh ta a.

1 Petera 1:22–25 chhiar la. He laia Kristian nih chungchânga thil pawimawh tak a sawi chu eng nge ni?

Petera hian Kristiante chu tihthianghlim an nih tawh thu (“... in thlarau in tihthianghlim tawh avângin. . .”) leh thutak zâwma an nun tawh thu (*1 Petera 1:22*) a sawi hmasa tê tê a. “Tihthianghlim” tih thumal (verb) hi “thianghlim” tih leh “thianghlimna” tih te nêp pawh a inzawm hnai hlê a, chutiang chuan châng hmasa lamah pawh a lo hmang tawh rêng a (*1 Petera 1:15*). Isua hnênah an inpumpêk tawh avâng leh

baptisma an chan tawh bawk avângin Kristiante chu Pathian tâna inserh hrangin an intithianghlim tawh a, chu chu thutak zawmnain an entîr ðîn a ni.

Hetianga an nuna danglamna lo thleng hian danglamna dang a thlen ve leh chhâwng zêl a. An rilru ang pu ve tho mi dangte nênzawmna thûk tak an lo nei ta ðîn a. Chu a inzawmna chu a nghêt êm êm a, Petera phei chuan chhôngkua angin a sawi hial rêng a ni. Kristiante chu unau anga inena khawsa tlâng tûr an ni a. 1 Petera 1:22-a “unaute hmangaihna” tih sawi nâna Grik thumal a hman, *philadelphia* tih hi a ngial ngana lehlin dâwn chuan “unaunu/unaupa hmangaihna” tih tûr a ni ang. Hetiang hmangaihna hi nu leh pa leh unaute inkâr inhmangaih tawna awm ang hi a ni.

Grik ðawng chuan “hmangaihna” tia lehlin theih tûr thumal eng emaw zât a awm a, chûngte chu: *phila* (ðian leh ðian inkâra inngainatna awm ang hi) te, *eros* (nupa leh nula leh tlangvâl inkâra inhmangaihna awm ang hi) te, *agape* (hmangaihna thianghlim, mi dangte ðatna tûr zawnsakna ang chî hi) te a ni. Peteran “ðahnemngai takin inhmangaih tawn rawh u” (1 Petera 1:22) tih thu a ziaha Grik thumal a hman chu *agape* a ni a—chu chuan hmangaihna thianghlim, mi dangte ðatna tûr zawnsak duhna a kâwk tlângpui. Chuvâng chuan “thinlung thianghlim taka” (1 Petera 1:22, NKJV) inhmangaih tawn ðeuh tûr pawhin a hrilh a, chu thinlung chu Pathian Thu nung reng leh chhe thei lo laka piang tharten an neih ðin a ni bawk. Hetiang hmangaihna hi chu Pathian laka chhuak a ni a; mahni hmasialna, mahni indah pawimawhna leh thinlunga piang thar lote chuan an lantîr ve thei dâwn lo va, chuvâng tak chuan a nia Petera pawhin tihthianghlim tawh nih hlutzia leh “thutak zawm” a pawimawh thu a sawi uar viau rêng ni. Thutak chu thil eng emaw a dik a ni tih rinna ni ringawt lovin, a nuna nunpui ngei tûr a ni bawk.

Engtin nge mi dangte hmangaih leh zual theih dân tûr kan zir ang? “Thinlung thianghlim tak” ațanga lo chhuak hmangaihna chu kan lantîr theihna tûrin eng duhthlannate nge kan siam ngai ngei awm le?

ZIRTÂWPNI

APRIL 7

Ngaihtuah zui tûr: Petera lehkathawn pakhatna bung hmasa ber thuken hausakzia leh thûkzia bâkah, a hâwl zauzia hi a mak ngawt mai. A bulțan nân Pathiana minung pathum—Pa leh Fapa leh Thlarau Thianghlim nungchang a han sawi hmasa phawt a. Pa chuan a Fapa Isua Krista hmangin chhandamna a rawn thlen a, amahah chuan tihthianghlim ni tûr leh thu zâwm tûrin thlan kan ni tawh a ni. Isua chu hmangaih tûrin kan lo kal a, a thihna leh a thawhleha avângin vânah hian “rochan chhe thei lo” chu kan tân dah a nih avângin amahah chuan nasa takin kan hlim bawk a. Chuvângin fiahna leh hrehawm tawrhna kârah pawh Kristaa chhandamna min pêk avâng chuan nasa takin kan hlim thei ta a ni. “Petera lehkathawnte hi fiahna leh hrehawm tuarte fuiha tihhuaisen nân leh, an rinna tihchaksakna tûra ziah a ni a. Pathian an rinna thlah mai thei dinhmuna ding mêk fiahna tam tak tâwktuten hna ța an lo thawh chhonzawm leh theihna tûra ziah pawh a ni bawk.”—Ellen G. White, *Tirhkohte Thiltih*, p. 517.

Thlarau Thianghlim chuan zâwlneite kaltlangin Petera leh a lehkathawn lo chhiartu tûrte hunlaia thil awm dân tûr a lo sawi lâwk tawh a. Chumi azârah chuan Kristiante chu thianghlim takin an nung ang a, thutak zawm duhna thinlung pû-in, “thinlung thianghlim tak” ațanga lo chhuak hmangaihna chuan an inhmangaih tawn țeuh tûr a ni.

Sawi ho tûrte:

- ❶ Nilaini zirlai tâwpa zawhna: Eng vângin nge Kristian kan lo nih? tih in chhânnate kha en nawn leh ula. In chhânnate chu a inang hlawm em? Engtiangin nge a danglam?

- ② Petera hian a lehkhathawn pakhatna bung hmasa berah hian Isua thawhleh thu vawi hnih ngawt a sawi lang a (châng 3 leh 21). Kan rinna kawnga Isua Krista thawhlehna chungchâng a pawimawh êm êmna chhan chu eng nge ni?
- ③ Petera hian “rochan chhe thei lo” chungchâng a sawi a (*Daniela 7:18* pawh en bawk la). He thu hi eng nge ni a awmzia? He khawvêla thil awmte leh mihring nun ngei pawh hi chuai thei leh chhe nghâl mai thei te a ni hlawm a. Hêngte hian rochan chhe thei lo pêk tiam kan ni hi a ropuizia leh vânehthlâkzia engtin nge min hrilh?
- ④ Engtin nge kan rinna hi fiahna leh harsatna kârah pawh a ùthan zêl theih ang? Chumi awmzia chu, hrehawm kan tawhrite aṭanga zirlai kan zir chhuah zêl theihna tûrin eng duhthlannate kan kan siam theih awm?